

摘藻堂四庫全書薈要

集部

欽定四庫全書薈要卷一萬八千三百六十二

兵部

御選宋詩卷五十五

七言律詩十一

劉克莊

答友生

讀易參禪事事奇
高情已恨挂冠遲
清於楚客滋蘭日
貧似唐人乞米時
家為買琴添舊債
廚因養鶴減晨炊
君看江表英雄傳
何似孤山一卷詩

漁梁

春泥滑滑雨絲絲一路陰寒少霽時
水入陂渠喧似瀑雲從山崦上如炊
燎衣去傍田家火炙燭來看野店詩
落盡梅花心事惡獨搔蓬鬢遶殘枝

方寺丞新第

一生不蓄買田錢華屋何心亦偶然
客至多逢僧在坐釣歸惟許鶴隨船
按行花木皆朋友主掌湖山即事權
京洛貴人金谷裏安知世上有林泉

方寺丞艇子初成

船成莫壓野人過久欲從公具釣蓑
積雨晴來湖面闊殘花落盡樹陰多
新營小店皆依柳舊有危亭尚隔荷
所恨前峰含暝色不然和月宿煙波

十月二十二夜同方寺丞宿瀑菴讀劉賓客集
瀑山木落霜寒夜共讀吾家夢得詩
坐對遺編忘漏盡手遮殘燭怕風吹
森嚴似聽元戎令機警如看國手碁
千載愚溪相對壘未應地下友微之

崇化麻沙道中

經行愛此人煙好面俯清溪背負山半艇何妨呼渡去
小橋不礙負薪還遠聞清磬來林杪忽有朱欄出竹間
深處安知無隱者卜鄰容我設柴關

零陵

畫圖曾識零陵郡今日方知畫未如城郭却臨瀟水上
山川猶是柳侯餘驛亭幽絕堪垂釣巖室虛明可讀書
欲買冉溪三畝地手莒茅棟徑移居

移竹

借居未定先栽竹為愛疎聲與薄陰一日暫無能鄙吝
數竿雖小亦蕭森窗間對了添詩料郭外移來費俸金
自笑明年何處在虛簷風至且披襟

秋熟憶舊遊

塞上秋光冷似冰當年豪舉氣憑陵打球不用炎方馬
按獵初調異國鷹山寨淒涼開戍鼓水邨搖落見漁燈
而今病暍茅簷底追記猶堪洗鬱蒸

為圃二首

屋邊廢地稍平治，裝點風光要自怡。
愛敬古梅如宿士，護持新笋似嬰兒。
花窠易買姑添價，亭子難營且築基。
老矣四科無入處，旋鋤小圃學樊遲。

衰病歸來占把茅，譬如僧葺退居寮。
因存橘樹斜通徑，怕礙荷花小著橋。
古有功名興釣築，今無物色到漁樵。
可憐歲晚閒雙手，種罷蕪菁擷菊苗。

即事四首

買得荒郊五畝餘，旋營花木置琴書。
柳能樊圃猶須種，蘭縱當門亦不鋤。
無力改牆姑覆草，多方存井要澆蔬。
區區才智聊如此，誰謂先生廣且疎。

目為詩客不勝慙，喚作園翁定自堪。
抱甕荷鋤非鄙事，栽花移竹似清談。
野人只識羹芹美，相國安知食筍甘。
富鄭公事晚覺齊民書最要，惜無幽士肯同參。

牆角新開白版扉，時尋樵牧弄煙霏。
代畊豈若收躬稼，賜帛何如出自機。
湖海浪游今已倦，山林獨往未全非。

百年只願留身健長為慈親負米歸

待鑿新池引一灣更規高阜敞三間縮牆恐犯鄰家地
減樹圖看屋後山身隱免貽千載笑書成猶要十年閒
門前驀有相尋者但說翁今怕往還

題袁祕書文稿

場屋聲名淳紹初同時一輩曉星疎舉人尚記前鄉貢
天子亦呼行祕書出蜀詩堪編杜集涉湘文可補騷餘
中朝典冊須鴻筆何必然藜照蠹魚

次韻實之春日

梅醖朝衣塵滿鞞曾穿細仗對延和角巾久已尋初服
錦帳何須戀舊窩能讀書人天下少不如意事古來多
半生寂寂因迂闊垂老方驚歲月蹉

陳起

題適安清湖寓居

薰風軒檻曉晴開鬱鬱桐陰手自栽二水合流當戶過
一山分影入樓來琴逢良夜時揮弄詩欲名家巧剪裁

可羨一廬安所適紛紛車馬汨黃埃

宋伯仁

寄樓雲卧

雲卧西湖又幾年吟鞍多在酒壚邊
定知今古皆春夢不把功名作宿緣
芳草滿汀山帶雨黃梅落地水連天
相逢來說江南事且問何時理釣船

李曾伯

寧國道間喜晴

怪得虛簷寂溜聲起來雲淡月微明只消一夜西風力
盡埽千山宿霧清農舍少酬終歲望客途擬過小春晴
枝禽亦似欣欣意飛入煙林自在鳴

利州登棧道

足跡初來劔北州試登危棧瞰江流萬山西接地窮處
一水東歸天盡頭欲訪嶠函無健馬相忘楚漢付輕鷗
丈夫要了中原事未及持竿老釣舟

簡項仲宗游亭臯

試從沙渚入荆城十里金堤掌樣平曉露香留紅芰溼
午風清逐白蘋生柳邊繫馬頻沽酒沙際呼魚旋作羹
所欠直惟佳客耳明朝能暇輒偕行

丙午九日將過陽羨偶成

年年秋晚對風沙今近重陽喜在家自斷此生甘皓首
能消幾度看黃花閒身頗覺便筇竹醉態都忘脫帽紗
且問小舟溪上去飛鷗數點夕陽斜

姚勉

題西湖竹閣寺二首

入門纔見萬琅玕，便覺玲瓏日影寒。
峰勢近環簷外立，湖光更好竹中看。
煙霞古淡僧容瘦，風露清高鶴夢殘。
已占兩亭涼坐足，再須登閣倚闌干。

千古清風白樂天，昔時曾此飽談禪。
自從西閣無吟迹，惟有東坡嗣舊傳。
來往祇應湖上寺，聽聞誤說海中仙。
我來再拜祠堂下，笑摘巖花薦井泉。

瀛嶼

孤山御園
中涼坐

自是瀛洲近帝鄉孤峰宛在水中央地雄海上三山境
天與仙家六月涼雲母屏寒蒼檜色水精奩啓碧湖光
雪中來此尤須別好著珠蓑棹玉航

題百花林書堂

書堂靜占百花林蜀錦香浮一徑陰楊柳軟風吹雨醒
海棠輕霧擁春深盈尊有酒供清醉滿眼皆詩足勝吟
冰雪相看人更好竹君梅友歲寒心

題道士碧潭

幽人何處倚漁竿
百頃清潭浸碧寒
不動一波疑水定
中涵萬象覺天寬
山將螺髻堆銅鏡
月借玻璃現玉盤
莫作窈深無底看
是間應有卧龍蟠

次韻諸友遊雲居

又是東風柳絮時
催春尚喜杜鵑遲
雨晴蔓綠侵高木
風定殘紅閣舊枝
眼底好山娛意思
耳邊幽鳥語心期
雲居見說郊行樂
不得騎驢背錦隨

再和通判直閣立春聞鶯韻

畫角聲中曉喚春依城柳眼又精神試呼臘蟻梅邊酌
恰喜朝鶯雪底新幽谷暖融春翠溼上林香動軟紅塵
燕樓暗想翻新曲惱破朱櫻一點唇

朱繼芳

溪寺

背人沙鳥一行斜喚客桐魚幾疊擗誤向山中叅白足
不知頭上著烏紗煮茶煙暖浮新竹洗鉢泉香帶落花
過夏功勞眠與食誰能展卷看楞伽

少年遊

紫陌尋芳愛馬遲一春能得幾晴時
海棠露重衣全透楊柳風微帽半欹
大白引浮銀鑿落小紅吹徹玉參差
人生行樂須年少莫等星星滿鏡絲

次韻池上暮雨

濕徧闌干欲倚休手中團扇漸知秋
細聲合作簷間溜大點漂成水面漚
小小竹窗醒倦鶴疎疎荷屋冷棲鷗
漁翁蓑笠隨身在立到黃昏釣未收

鄒登龍

水亭

闌檻玲瓏直又橫半臨池水著新亭擬招鷺宿栽添葦
怕礙魚行掠去萍五月藕花千樣錦四時山色一般青
有閒來此尋幽賞莫看人間淡墨屏

羅與之

送春

政是風光欲別時可堪煙外雨絲絲怕看太白餘春賦

嫌誦淵明止酒詩
晝短擬教持蠟炬
愁深悔不下書帷
自知無計能遮道
任作園林隔歲期

朱南杰

垂虹亭

憑虛蝦蟇逼人寒
中有危亭百尺寬
天接水腰呈絕景
風回帆脚漲狂瀾
半篙落日吟將就
一抹晴烟畫亦難
不是酒杯今日窄
直須邀月上闌干

出嘉興

舟出嘉禾五里城，僧樓山塔互崢嶸。
酒旗密比隨風舞，漁網橫拖漾日晴。
畫舫貴人帆去穩，單衣游女著來輕。
山歌已接長河堰，到得臨平月又明。

林尚仁

秋日書懷

十年客路歎飄蓬，歷盡風霜鬢欲空。
睡少半疑茶作祟，愁多全覺酒無功。
數菴厭靜鳴秋雨，一葉驚寒落晚風。
惆悵故園歸未得，草荒籬下菊花叢。

清真觀

一宮占斷水中央
瘦竹添丁護短牆
老鸛聲中松子落
遊魚影裏藕花香
雲房不雨琴常潤
池閣無風榻自涼
擬辦隱心終老此
便須歸與鶴商量

陳必復

偶成

遶屋栽梅亦可人
最憐夏日綠陰清
前邨雨過山如洗
深徑風來竹自鳴
滌硯不嫌池水冷
寫書愛傍午窗明

近吟未許人知得且向梅邊隱姓名

薛嵎

送潘道士

春渚微茫百草連千花飛盡柳飛綿孤雲野鶴生遙思
明月清風共一船破褐還尋棲隱地空囊惟乞送行篇
先生自有修真訣不倚丹砂駐少年

漁邨晚照

舊遊憶得瀟湘路今喜煙波似舊時澤畔怕逢漁父問

桃源已被世人知
數家草市添新戶
一樹寒鴉傍古祠
蘭杜香深洲渚濶
小窗長日賦騷辭

黃大受

沙頭秋

宿風吹凍玉池冰
留滯周南尚未行
病久故園千里夢
夜寒孤舍一燈檠
愁緣南賈歸舟影
心斷黃蘆落鴈聲
老劍已閒頭已白
祇堪疎詠課歸程

吳龍翰

夜泊富陽

片帆東去一鷗輕，消得天公十日晴。
新酒一尊詩幾首，故鄉千里月初更。
煙收山翠揩摩淨，風染江波熨貼平。
苦是狂懷費消遣，船頭吹笛到天明。

武衍

睡覺

睡覺東風忽惘然，起翻雲母續爐烟。
半醒不醉宿醒思，欲雨又晴寒食天。
春草池塘詩夢裏，梨花庭院酒尊前。

誰憐倦客長安市節物驚心憶舊年

晴絲

何處飛來繚碧空敲吟終日費形容
樽桑老蠶抽纖緯星殿殘機剪素茸
驀忽帶歸簾外燕等閒惹住柳邊蜂
風柔日薄樓臺晚一縷低垂力正慵

張蘊

江湖偉觀

隄柳朝朝送酒船一闌山色越帆煙
蓬萊雲氣東溟外

閶闔星辰北斗前
突兀向來無此屋
登臨當日有諸賢
夕陽過鴈慵回首
吟入關河萬里天

西湖清明

芳天新霽惠風和
軟綠平鋪凝不波
桃李無言看客慣
樓臺如畫占山多
游裾匝路填車馬
翠榜開筵闕綺羅
寂寂寒煙生水面
白鷗奈此月明何

春朝偶題

忙裏偷閒答物華
一官隨分是生涯
春風酒棹湖堤柳

曉月吟韉輦路花報喜忽聞枝上鵲忘機時下屋頭鴉
殘年鈍悶今朝盡重對菱花拂帽紗

趙希輅

春暮

薄薄寒侵酒面和可憐春事委流波兩堤楊柳東風老
一曲池塘夜雨多花落鶯聲還在否桑空蠶事又如何
壯心不逐流年去倚劒青天發浩歌

中秋

白露溥空萬葉飛生香渾在桂花枝一千里月正圓夜
九十日秋纔半時湓浦風流元亮興鄜州牢落少陵詩
不妨吟盡蟾蜍影此別分明隔歲期

江湖偉觀

華屋巋然占上方一尊同此寄相羊江潮翻海暮天闊
湖水拍堤春草長莽莽越山凝紫翠搖搖蘇柳間青黃
歸鴻影裏闌干曉回首中州入渺茫

鄧林

江湖偉觀

世間無盡是天游更出湖山最上頭
江面春聲潮卷雪湖心寒影月澄秋
海門舟楫雲開見瀛嶼亭臺水載浮
不比錢塘歌舞處遠懷西北有神州

吳惟信

謀生

謀生一事到成功消得湖邊地幾弓
韋曲有花留杜老洛陽無客問盧仝
春風燕子虛簷外夜雨蛩聲小徑中

所立規模雖冷淡絕勝彈鋏舊飄蓬

黃文雷

玉壺即事

雨過條風著柳芽
淡黃淺綠嫩如花
陂湖漾漾初侵路
蜂燕紛紛各理家
帶郭園林仙苑近
送春船舫繡簾遮
芸窗倦倚何山翠
暖靄輕籠日脚斜

葛起耕

姑蘇懷古

闔閭城下水連天故國淒涼思惘然堤柳數行垂舞帶
砌苔幾疊暈歌鈿了無麋鹿遊臺下祇有鳬鷺戲水邊
往事如今銷歇盡斷霞殘照鎖寒煙

初春感舊

又是春生杜若洲憑闌回首總關愁雲橫楚峽縈新夢
月泛吳波憶舊遊立馬醉題花外驛聞鶯笑倚柳邊樓
如今萬事經心嬾祇合長歌擬四休

春懷

過了花朝日漸遲相將又是禁煙時寒留柳葉淒迷處
春在梨花寂寞枝牛角橫書孤壯志鹿門採藥語幽期
自憐白髮成何事說與啼鶯未必知

贈燕

鎮日雙棲向畫梁有時飛去為誰忙得泥趁暖添芹壘
掠水因風貼柳塘語重喚回芳草夢舞輕時肯落花香
五陵年少傷春恨書繫紅絲擬寄將

東歸

游倦歸來似長卿
敝廬事事費經營
埽除塵土虛堂潔
拂拭窗櫺舊紙明
徑菊已荒惟草長
井花少汲覺苔生
寒衣未辦西風急
不耐鄰家砧杵鳴

胡仲參

秋晚泛湖

載酒湖邊買小舟
水光山色解人愁
短籬寂寂菊花晚
兩岼蕭蕭楊柳秋
落日波間收戲鼓
暮煙林外出歌樓
倚闌長嘯西風裏
驚起前汀雙白鷗

用馮深居韻題莆陽章氏環翠樓

百尺危梯渺海寰
闌干十二盡青山
煙光濃淡藏多景
野水周遭匝四環
勝地只宜騷客住
老天未放主人閒
憑誰說與九仙道
方丈移來在此間

陳鑒之

再到京口

問訊金焦無恙不
雙鰲依舊據寒流
塔邊浪戰嵌巖石
木末雲扶縹緲樓
楓葉蓼花新醉雨
山容客髯兩添秋

海天一鏡舟如豆忘却塵縉李子裘

陳允平

侍謝立齋小酌湖樓

風捲珠簾客佩清杜鵑啼老送春聲水浮亭館花間出
船載笙歌柳外行千里夕陽歸夢遠六橋飛絮馬蹄輕
闌干倚徧暮天濶煙樹一鉤新月生

仲冬南樓野望

繡幙香溫生暮寒淡煙漠漠水漫漫吟殘庾嶺梅千樹

夢遶湘江竹萬竿風捲亂鴟棲古塔雪迷孤鴈落前灘
一聲玉笛人何所更上南樓獨倚闌

西湖暮春

雲山疊疊樹重重浙水迢迢客夢中啼鴉數聲春去日
落花滿地夜來風松關鶴立吟壇靜竹院僧眠丈室空
明月馬蹄何處所夕陽芳草畫橋東

過姚秋江釣磯

莎草離離碧樹閒祇疑曾是子陵灘
槿花籬落蟲聲碎

蘆葉汀洲鴈陣寒江上浪平潮正熟渡頭人去月初殘
夜深不管蛟龍睡獨對西風把釣竿

宿大慈山悟真觀

終南道士學彈琴門外松蘿鎖翠陰瀕海入龍朝出洞
隔山羣鹿夜歸林琪花過雨金風澹玉樹籠煙碧月沉
三十六壇鐘鼓寂雲璈聲接步虛音

樂雷發

呈廣西張提刑

陸續城邊按部歸梅花隨處撲征騑溪山有助吟題徧
獄市無冤訟牒稀竹屋聽猿眠碎月莎庭引鶴步斜暉
莫嫌瘴霧浸湘客路滿風霜冷泉衣

送丁少卿自桂帥移鎮西蜀

瓊海收兵玉帳閒又移齋艦泝涪灣三邊形勢全憑蜀
四路封疆半是山魏將舊聞侵劔閣漢兵今欲卷函關
時會有二京之役細傾瑞露論西事想在元戎指畫間

逢熊季可

暮雲春樹飽相思今共秋風捋白髭北闕未知鸚鵡賦
南洲空誦鷓鴣詩旗亭尚憶髡能飲客路誰知朔獨飢
賴有湘翁生計在且吟九辨擷江蘼

張至龍

紫薇閣贈凌丹士

風林葉葉帶新寒已著齏鹽客味酸兔抱栗眠傳道石
鹿銜花上拜章壇沿厓取水和冰嚼埽壁題詩當畫看
盡日元房無俗語山鐘敲月上闌干

寄胡竹洲

野菜生根土亦香寒林晴久漏春陽
山臨古畫開當戶
蝸學新書篆滿牆密竹旋刪嫌礙月
青柑遲摘待經霜
兒童閒取池頭水剗破琉璃綠一方

北津

獨立長橋喜近城半闌斜日又催行
船過別浦波痕沒
堠立當塗里界明古木雲邊僧住處
落花風裏鳥啼聲
青山莫道渾無事自與行人管送迎

晚步寄劉徵齋

縱橫屐齒印蒼苔
夢筆山高翠作堆
日帶晚光歸海去
風傳秋信下天來
竹開小路通螢過
松守空巢待鶴回
蚋蝨乾坤還自樂
何須金屋玉樓臺

毛珣

寓泉之安溪

已恨逢人語不通
更堪煙嶺隔千重
山城縱是如花好
海霧終愁似墨濃
遠信斷無鴻可寄
故鄉惟有月相逢

間於荔綠蕉紅處步屨時留到晚鐘

徐集孫

官舍雙桂

翠玉黃金剪綴成幽香不斷襲人清獨披月色連宵看
更結秋風來歲盟好夢偏為蜚蚪破吟聲那似蜨飛輕
紛紛凡卉誰堪眼說與寒梅早合并

洞庭夜坐

片葉秋風數日程爭如天籟未秋聲厭居塵境炎威熾

來納虛亭夜氣清萬點螢光移醉眼一湖蟾影蕩吟情
笙歌寂寂重關掩獨許高僧並臂行

王琮

城西即事

清曉離家去路遙絕憐寒景太蕭條松深漸覺風聲緊
雲動還知雪意銷沙觜客擔魚種賣山頭人拾樹枝燒
梅花多處誰家酒斜舞青帘隔小橋

王柏

適莊兄遊山

誰閣重陰一日晴清遊應是愜高情遙知雨後山光好
但想雲邊屐齒清素壁雖曾題舊字沉疴不許插新盟
因知關吏留魚鑰謾遣奚奴候晚程

孫惟信

送女冠還俗

脫却霞綃上醺衣女童髻髻綠楊垂重調螺黛為着淺
再試弓鞵舉步遲紫府煙花鶯喚醒丹房雲雨鶴通知

簾低紅杏春風暖清夢應曾見舊師

何偁

江閣

清江遶檻白鷗飛坐看潮痕上釣磯松菊未荒元亮徑
芰荷先製屈平衣窗前楓葉晨初落亭下鱸魚秋正肥
安得從君理蓑笠櫂歌相趁入煙霏

方逢辰

被召不赴

萬里皇華遣使輶姓名曾覆御前
甌燕臺禮重金為屋
嚴瀨風高玉作鈎丹鳳喜從天上落
白駒須向谷中求
敲門不醒希夷睡休怪山雲著意留

羅椅

謁趙東野

水樹搖窗榻見天空花換盡我依然
吟情豁處因同道
飲趣深來頗入禪不以耳聽何用洗
且無琴在底須絃
未知遇得開關否破費滄江月一船

錢選

雪霽望弁山圖

倚天蒼弁獨崔嵬仙闕遨遊愧不才
覽鏡頻嗟雙鬢改推窗三見六花開
山中酒戶衝寒去城裏行人踏雪來
安得時晴風日好竹林深處且銜杯

何夢桂

燈夕樂舞

天碧星河欲下來東風吹月上樓臺
玉梅雪柳千家開

火樹銀花十里開
紫鳳笙繁聲曼行
黃龍舞縵影徘徊
香車匝地紅塵軟
莫遣銅壺漏箭催

寄夾谷書隱

當年曾憶賦高唐
回首邯鄲事渺茫
黃閣故人千里月
青山老我半頭霜
交情脈脈園中柳
憂思悠悠陌上桑
吹斷參差天欲暮
薄言蘭芷寄衡湘

感興

賸得田園歸去來
江南兩度見黃梅
軒窗有侶餘松竹

牆壁無人半蘚苔獨抱丹心徒自苦相逢白首不須哀
人間萬事不可極一夢蘧蘧心已灰

丁亥清明和昭德姪孫韻

風吹苦棟結輕寒乾石青精屋半間潑火雨收春樹綠
踏青人出畫簾閒紅顏白髮悲歡事舊日新年夢覺闕
滿地落花啼鳥急天涯遊子幾時還

山窩適興

剩得閒身祇自憐更憐閒占此山泉滿堦碧草客稀到

半榻白雲人對眠
窗影枝搖知雀踏
壁痕苔溼認蝸涎
日長靜看辛夷樹
花落花開忘宿緣

夜坐有感

銀漢無聲玉漏沈
樓高風露入衣襟
洞龍睡熟雲歸岫
枝鵲啼乾月滿林
甕裏故書前世夢
匣中孤劍少年心
征鴻目斷闌干角
吹盡參差到夜深

巳卯春過西湖

世事誰家屋上烏
重來猶認舊西湖
風帘隔岼自高下

煙寺前山半有無
野水菰蒲飛屬玉
夕陽闌檻喚提壺
十年不記梅花夢
試向孤山問老逋

寄王南叟寓江鄉

歌盡驪駒落日寒
相思無處問平安
客愁白髮三千丈
世路青泥百八盤
夜月梅花頻入夢
秋風菰米強加餐
高山如故絲絃在
嬾向旁人取次彈

招隱

別後頻驚束帶寬
相逢亦復笑蒼顏
祇今歲月青牛老

何處煙波白鳥閒
千古心期寒綠綺
十年世事隋黃間
修篁倚徧空江暮
枉殺招呼費小山

方夔

溪上

古木陰陰溪上邨
隔溪呼喚隔溪鷹
柳堤漁艇水雙港
山崦人家雲半層
早麥熟隨芹菜餉
晚茶香和樹芽蒸
自慙未得亢桑樂
癡坐寒窗似凍蠅

魏新之

春日田園雜興

農圃誰言與世違
韶華正恐屬柴扉
天機花外聞幽哢
野色牛邊睨落暉
膏雨平分秧水白
光風小聚藥苗肥
行歌隱隱前邨緩
忽省深山有薜薇

邵桂子

錢魏州判鵬舉

松下吟哦幾唱酬
却攜螃蟹餞監州
穩挑書擔去環碧
頻寄詩筒來雪舟
異姓弟兄千里月
故山泉石一天秋

葛峰隱者如相問為道瓜侯已白頭

題環碧亭

十里漣漪陸瑁湖一亭幽絕仲先居雲根數朶排青闥
泉沫雙流濺綠裾竹鎖斷橋飛鴈鶩荷侵涼檻蔭龜魚
洛園還許人同樂時向林間望小車

盧珏

天邊風露樓

十二闌干俯碧溪憑高一覽衆山低晴灘歷歷輕帆上

煙樹重重幽鳥啼但覺興隨流水遠不知身與白雲齊
年來欲問東皇信多種梅花在竹西

錢大椿

春夜

燕子銜泥已下簾深深庭院薄寒天海棠枝上黃昏月
楊柳梢頭淺澹煙勾引芳情春夢蜨頻催愁緒夜啼鵲
踏青年少歸來晚斗酒花陰枕石眠

熊鉉

送雒陽靳都事

銅駝巷陌棘風涼尚記東都舊帝鄉
甲馬營空雲氣遠杜鵑聲老雒園荒
天開地闢人才出風起雲飛汗竹香
倘得行窩容我老春風借地種姚黃

越州道中

野田秋溜正潺潺新翠喬林遶舍環
淡日凝煙橫別浦斜風吹雨過前山
柴扉初放牛羊出漁艇方攜蟹蛤還
自笑平生愛遊覽天教長在水雲間

客裏書事

西風涼信入虛簷
絺綌微單已戒嚴
鄉夢不隨秋夜永
客愁偏向雨聲添
清高鳴雁低雲海
漂泊流螢傍竹簾
搔首寒燈樓舍悄
行藏自曉不須占

陳觀

天遊峰

山水參差六曲流
此中絕境適天游
幾千萬類塵根淨
三十六峰雲氣浮
翠聳層霄巒壑勝
碧籠靜澗竹松稠

瓊漿可致胡麻熟瓢笠何妨為永留

年嶽

春雪

一冬只辦作嚴寒剪水飛花事竟難閉戶不知春意動
撲窗忽覺雨聲乾頗聞萬畝方雲集何處一蓑如畫看
但喜畦蔬得蘇醒從今小摘有餘歡

真桂芳

春晚雨

破曉簷花未放乾披衣和夢倚闌干釀成苔暈地猶溼
老盡鶯聲風正寒無客醉敲金鐙響有人睡怯翠衾單
牡丹一夜成消瘦下却珠簾不忍看

西湖圖

兩袖春風一杖藜等閒踏破柳橋西雲開遠嶂碧千疊
雨過落花紅半溪青旂有情邀我醉黃鶯無恨為誰啼
東城正在桃林外多少遊人逐馬蹄

漁浦晚秋旅懷

西風吹夢越中遊
剪剪輕寒入短裘
鴈字不將鄉信寫
蛩聲空和旅吟愁
郵亭冷雨孤燈夜
漁市斜陽一笛秋
是處山川即吾土
仲宣何用怯登樓

泊舟嚴灘

天色微茫入暝鐘
嚴陵湍上繫孤篷
水禽與我共明月
蘆葉同誰吟晚風
隔浦人家漁火外
滿江愁思笛聲中
雲開休望飛鴻影
身即天涯一斷鴻

連城春夜留別張建溪

飛絮遊絲客子心連城那忍遽分襟青燈應見詩情苦
濁酒不如交味深一榻暖風棲竹屋半闌淡月立花陰
離懷今夜先收拾盡付明朝馬上吟

春行

短帽輕衫步履遲微暄天氣乍晴時池融嫩碧消殘凍
春剪新紅綴舊枝嵐翠滴衣堪入畫禽聲到耳足供詩
東風苦欲招人醉頻掉橋西賣酒旗

三峰寺

寂寞煙林噪亂鴉青鞵步入野僧家雲深不礙鐘聲出
日轉還移塔影斜郎下蝸黏沿砌蘚佛前蜂戀插瓶花
竹牀紙帳清如水一枕松風聽煮茶

夜飲趙園次徐君實韻

銀臺絳蠟淚成堆四面軒窗盡放開花影忽生知月到
竹梢微響覺風來豪揮彩筆詩千首醉倚紅妝酒百杯
遊玩未闌歸未得高城漏箭幾相催

山行

林梢初日弄陰晴
露浥溪花笑欲迎
澗暗只聞泉滴瀝
山青剩見鷺分明
遠峰忽轉還如遶
險徑徐行亦似平
莫謂詩成無與和
風篁也解作吟聲

永嘉秋夕

風戰枯桐敲紙窗
擁裘無寐夜偏長
譙樓三鼓夜將午
雲鴈數聲天正霜
寓世此身驚逆旅
寬懷何處不吾鄉
江頭風景日堪醉
酒美蟹肥橙橘香

夜坐

匹馬平生汗漫遊如今寂寞老林樾
小窗半夜青鐙影幽樹一庭黃葉秋
嬾看世情寧睡去怕傷時事莫吟休
寒蛩可是知人意來到莎根只說愁

初冬

林葉新經數夜霜地爐獨擁一山房
塵書邀我共高閣濁酒勸人歸醉鄉
費省家貧還似富身閒日短亦如長
梅花苦欲催吟興又破梢頭半點香

初夏

一夜薰風帶暑回
雨天濃翠暗庭槐
不隨春去鶯猶在
好競時妝榴又開
剪尺旋裁新白苧
杯盤聊薦舊青梅
篋中敝扇投閒久
依舊團團入手來

奉和春遊呈雲耕叔祖

節遇中和景漸暄
自摩倦眼望前邨
彫鏤花柳春無跡
沐浴山川雨有恩
憶昔踏青終日醉
如今垂白幾人存
未應便作衰翁看
藉草猶堪倒一尊

幽棲

鶴護松扉久不開蒲團端坐思悠哉故交只向夢中得
閒事不經心上來雙屐躡雲春採藥一筇挂月夜觀梅
東風似見山童嬾自與幽人埽徑苔

次李林居春曉遊園

滅沒晨曦弄淡晴追隨杖屨竹間亭花逢酒侶容先醉
柳見詩人眼剩青三月光陰半流水百年身世一浮萍
啼鵲只管催春去不道衰翁已怕聽

杜鵑花得紅字

愁鎖巴雲往事空只將遺恨寄芳叢歸心千古終難白
啼血萬山都是紅枝帶翠煙深夜月魂飛錦水舊東風
至今染出懷鄉恨長挂行人望眼中

江頭春日

風暖旗亭煮酒香醉醒始悟是他鄉駕言行邁路千里
豈不懷歸天一方春事漸消鶯語老離愁偏勝柳絲長
無聊莫向城南宿淡月梨花正斷腸

送雲泉入山

薜蘿叢裏鬱青青別是幽棲一段清水色山光皆畫本
蟬聲禽語亦吟情人今不改衣冠古道重方知富貴輕
為語俗交休見問已從麋鹿訂新盟

朱溪澗

路轉峰回又一村天寒大半掩柴門雲融山脊嵐生翠
水嚼沙洲樹出根任擁重裘風亦冷未投荒店月先昏
今宵只傍梅花宿贏得清氛入夢魂

范師孔

武夷山

幾與溪山絕世緣
重來猿鳥只依然
懸崖野瀑飄成雪
近午嵐霏暗盡天
水尚未疏須識禹
山如深入定逢仙
洞中石鼎烹雲處
此夜還來借榻眠

趙若櫬

遇樵川林時中

建水樵川隔幾重
相逢孰意大江東
客行芳草垂楊外
春在柔桑小麥中
細雨疏田流水碧
殘霞擁樹遠林紅

浮生聚散渾無定有酒何妨一笑同

張逢源

題高彥敬夜山圖

地位清高眼界寬
盡收風景入毫端
廢宮臺榭和煙鎖
隔岸江山對月看
一水中分吳越近
層樓低接斗牛寒
有聲畫意吟難了
更把瑤琴膝上彈

汪斗建

錢塘懷古

江上城低煙樹紅
江潮西去幾時東
吳宮花草隨春暮
禹會樓臺入夢空
萬里孤雲留夕照
千年遺恨訴秋風
鳳凰飛去無消息
漠漠遙岑煙雨中

王奕

題小蒜嶺

西風策策麥花涼
重把新詩自品量
禽不為人音自好
路因無驛里偏長
百年白髮空前輩
兩載黃花笑異鄉
歸去玉瑯牢閉戶
莫教舊隱姓名香

何鳴鳳

春日田園雜興

星明天駟兆興農稼圃犁鉏處處同播穀競趨新禹甸
條桑猶記舊豳風草綠疆畝縱橫綠花隔藩籬深淺紅
自笑偷生勞種植西山輸與采薇翁

吳錫疇

春日

韶光大半去怱怱幾許幽情遞不通燕未成家寒食雨

人如中酒落花風一窗草憶濂溪老五畝園思涑水翁
無賦招魂成獨嘯且排春句答春工

晚春

書策爐薰了日閒雨餘庭砌綠迴環一春又是尋常過
兩鬢誰知容易斑輕薄楊花芳草岸淒涼杜宇夕陽山
不嫌貧有雙飛燕依舊銜泥自往還

僮諭

小隱生涯無別事護持蓑笠傍鷗沙清泉頻注吟邊硯

活火隨煎飯後茶
趁早須來添鶴料
便忙也去探梅花
焚香埽地齊書帙
客到牆東有酒賒

湯仲友

西湖

山色波光步步隨
古今難畫亦難詩
水浮亭館花間出
船在笙歌柳外移
過眼年華如去鳥
惱人春色似遊絲
六橋幾見輪蹄換
取樂莫辭金屈卮

御選宋詩卷五十五


謹案卷五十四第二十八頁前四行臨川送鄭遐
之雲夢刊本送訛逢今改

第三十二頁前一行自攜茶去借松風刊本松作
春據秋崖小稿改

卷五十五第四頁前六行富鄭公事刊本脫此四
字據後村集增

欽定四庫全書





總校官庶吉士臣侍朝
校對官檢討臣蕭九成
謄錄舉人臣李駟

欽定四庫全書薈要

集部

御選宋詩卷五十六

詳校官原任主事

臣

李斯咏



欽定四庫全書薈要卷一萬八千三百六十三

集部

御選宋詩卷五十六

七言律詩十二

文天祥

御賜瓊林宴恭和詩

壬戌以秘書省官與宴

奉詔新彈入仕冠重來軒陛望天顏雲呈五色符旂蓋
露立千官雜珮環燕席巧臨牛女節鸞章光映璧奎間
獻詩陳雅愚臣事況見賡歌氣象還



敬和道山堂慶瞻御書韻

墨灑天奎映籀紅
斯堂殿閣與俱隆
方壺圓嶠神仙宅
溫洛滎河造化工
列聖文章千載重
諸孫聲氣一時同
著庭更有邦人筆
稽首承休學二忠

著作之庭乃胡忠簡公書周文忠公

立

次韻劉左司前以著作郎主祕書省營繕事時落成適潘祕丞得郡攜李并餞行有詩

蓬壺日月四時春
金碧新來約帝宸
俎豆幸陪麟省雋

衣冠中有虎符新詩餘和氣生談麈坐久風光入醉茵
多謝蘭臺舊盟主好歸羣玉領儒珍

閒居和雲屋道士

一尊聊共此時心文字追隨落醉吟仙子樓臺修竹外
行人冠蓋畫橋陰一年芳草東風老五月空江夜雨深
且作蘭亭歡喜集更論誰後又誰今

題碧落堂

知瑞
州日

大厦新成燕雀歡與君聊此共清閒地居一郡樓臺上

人在半空煙雨間
修復盡還今宇宙
感傷猶記舊江山
近來又報秋風緊
頗覺憂時髩欲斑

題滕王閣

五雲窗戶瞰滄浪
猶帶唐人翰墨香
日月四時黃道闊
江山一片畫圖長
迴風何處搏雙鴈
凍雨誰人駕獨航
回首十年此漂泊
閣前新柳已成行

山中即事

攜壺藉草醉斜陽
白鶴飛來月下雙
蘆葉西風驚別浦

芭蕉夜雨隔疎窗
千年帝子珠簾夢
一曲仙人鐵笛腔
若問山翁還瘦否
手持漁竹下寒江

翠玉樓晚雨

晚樓一曲轉梅花
官事無多報放衙
林木蔽虧煙斷續
江流曲折雨橫斜
年華冉冉風前影
歲暮悠悠客裏家
一鴈近從沙嘴落
更饒片雪入天涯

隆興府

半生幾度此登臨
流落而今雪滿簪
南浦不知春已晚

西山但覺日初陰誰憐龜鶴千年語空負鵬鷗萬里心
無限故人簾雨外夜深如有廣陵音

重陽

萬里飄零兩鬢蓬故鄉秋色老梧桐鴈棲新月江湖滿
燕別斜陽巷陌空落葉何心定流水黃花無主更西風
乾坤遺恨知多少前日龍山如夢中

夜起

夢破東窗月更明此身雖在只堪驚一春花裏離人淚

萬里燈前故國情
龍去想應回海島
鴈飛猶未出江城
客愁多似西山雨
一任蕭條白髮生

謝枋得

題東觀辟

觀外好看船往迴
觀中幾度見桃開
常瞻紫氣青牛去
又帶白雲黃鶴來
天地無情搔短髮
古今多變付殘杯
醉中尚有醒時眼
不信玉山人可推

林景熙

雲門即事

最愛林中過客稀，坐分片石淡忘歸。
僧閒時與雲來往，鶴老不知城是非。
瀟灑山光秋入畫，清寒花氣曉侵衣。
一溪截斷紅塵影，西有任公舊釣磯。

答周以農

一燈細雨煮茶香，雲影霏霏滿石床。
萬里夢魂形獨在，十年詩力髩俱蒼。
山空絡緯悲秋雨，水落蒹葭足夜霜。
未會漆園觀物意，酒闌猶發次公狂。

歸白石故廬

四鄰井竈出荒墟獨鶴歸來認舊廬
一徑蒼苔供瘦策半簪華髮伴殘書
斜陽巷陌語初燕新水池塘生細魚
小立春風憐寂寞忽吹花片入襟裾

紀夢

江風吹夢到書樓樓外新鴻數點秋
葛老巾山空落照晉時帶水向東流
魚蝦市散荒煙合鳥雀門深細草幽
何處一聲長笛起覺來獨客在滄洲

答柴主簿

相隔雲江有夢尋
篇詩寄舊重兼金
山林未遂鹿麋性
風雨空愁葵藿心
老氣十年看劔在
秋聲一夜入燈深
銅槃消息無人問
寂寞西樓待鶴音

元日即事

宿霧沈城海日遲
十年冉冉鏡中絲
江湖舊夢衣冠在
天地春風鼓角知
杜曲桑麻歸已晚
尚平婚嫁畢何時
野人問我行藏事
自向庭前采柏枝

燈市感舊

舊夢仙山駕海鰲飛梅如剪柳如縑千門疑是繁星落
九陌不知明月高零亂遺鈿空宿草昇平疊鼓散春濤
寒燈寥落殘書在獨抱荒愁寄濁醪

謝翱

寄韶卿

莫因梅柳憶西湖且守仙華小隱居霜木絕憐諸老盡
雨燈動是十年疎休官陶令長思友陋巷嵇康嬾報書

衣食有餘休浪出我愁無地可耕漁

汪元量

萬安殿夜直

鳳銜紫詔下雲端千載明良際遇難金闕曉明天表近
玉堂夜直月光寒宮衣屢賜恩榮重御宴時開禮數寬
却憶元都人去後桃花零落倚闌干

酬王昭儀

愁到濃時酒自斟挑燈看劒淚痕深黃金臺迴少知已

碧玉調高空好音萬葉秋風孤館夢一燈夜雨故鄉心
庭前昨夜梧桐樹勁氣蕭蕭入短襟

邳州

身如傳舍任西東夜榻荒郊四壁空鄉夢漸生燈影外
客愁多在雨聲中淮南火後居民少河北兵前戰鼓雄
萬里別離心正苦帛書何日寄歸鴻

長沙

洞庭纔過浪猶高河伯欣然止怒濤傍岸買魚仍問米

登樓呼酒更持螯
湘汀暮雨幽蘭溼
野渡寒風古樹號
詩到巴陵吟不得
屈原千古有離騷

御宴蓬萊島

曉日重闌對冕旒
內家開宴擁歌謳
駝峰縷割分金盃
馬乳時傾泛玉甌
禁苑風生亭北曲
寢園月轉殿西頭
山前山後花如錦
一朵紅雲侍輦遊

鄭思肖

送人之行在

歌斷陽關奏暮笳東風吹客向西華三更舟渡淞江月
一路春連上苑花地逼星辰黃道近山環宮殿紫雲斜
茲遊歸計應須早莫遣相思夢繞家

懷歸

突兀高樓落照間此身迴出俯人寰客心不逐年華老
詩興何曾日夜閒峽水遠流天際海淮雲飛渡浙中山
杜鵑啼後歸舟發只有春愁滿載還

即事

河朔杯多席莫逃碧筒製酒飲兒曹雨餘地潤南風爽
秋近宵涼北斗高月下夢歸吳苑路天涯心遠浙江臯
靈均仙後無人怨誰肯明時賦續騷

周密

題張氏十詠圖

平生聞說張三影十詠誰知有乃翁逢世昇平百年久
與齡耆艾一家同名賢敘述文章好勝事流傳繪素工
懷想盛時生恨晚恍如身在畫圖中

連文鳳

春日田園雜興

老我無心出市朝
東風林壑自逍遙
一犁好雨秧初種
幾道寒泉藥旋澆
放犢曉登雲外隴
聽鶯時立柳邊橋
池塘見說生新草
已許吟魂入夢招

梁相

春日田園雜興

膏雨初晴布穀啼
邨邨景物正熙熙
誰知農圃無窮樂

自覺鶯花有舊期彭澤歸來惟種柳石湖老去最能詩
桃紅李白新秧綠問著東風總不知

楊本然

春日田園雜興

春風建業馬如飛誰是田園拂袖時栗里久無彭澤賦
松江僅有石湖詩踏歌槌鼓麥秧綠沽酒裹鹽菰芥滋
吳下風流今莫續杜鵑啼處草離離

全璧

春日田園雜興

倦遊歸隱白雲鄉
芳草庭閒晝日長
晉世衣冠門外柳
幽人風俗屋邊桑
青林伐鼓邨邨社
綠水平疇處處秧
未分東風欺老眼
一編牛背卧斜陽

呂文老

春日田園雜興

月笛紀閏附青煒
民野陶然化日熙
祀備扮揄祈歲德
宴酣花柳樂清時
洛中富貴斜陽恨
縣上勲勞千古思

浩興歸來吟不盡陶詩和後和幽詩

林子明

春日田園雜興

一點陽和薰萬宇最饒佳致是山莊雞豚祝罷成長席
鶯燕聽來隔短牆嗜酒不嫌多種秫無襦長恨少栽桑
東郊勸相何煩爾農圃吾生自合忙

劉蒙山

春日田園雜興

桑風吹綠滿原頭西崦東臯暖氣浮邨婦祈蠶分麪親
老農占歲說泥牛田烏飛逐耕煙犢桑扈鳴隨喚雨鳩
鄰叟相邀同社飲旋將新酒向花筍

周陳

春日田園雜興

蛙聲似吹雨初足桑椹欲紅風始和少婦每憂蠶利薄
老夫惟喜秫苗多舊栽花木山鶯識新買陂塘野鷺過
此境東風元自好當年金谷事如何

次僧韻

曾對寒爐細畫灰幾番回首重徘徊山間已有幽人占
門外寧教俗子來老杜句留修覺寺東坡詩在妙高臺
新涼擬辦登山屐莫待黃花逸興催

聞平湖僧紹義自嶺南歸又入浙

曾寫當年送別詩小窗幾度夢魂飛句從蒼蘓林中得
人在梅花嶺外歸禮罷祖師無有相徧參老宿悟來機
歸舟久住西湖上聞道新來景又非

姚潼翔

春日田園雜興

辟寫新年百事昌
春盤次第蓼芽香
燒燈過了爭挑菜
祭社歸來便撒秧
布穀幾聲催耜畝
吳蠶三伏正條桑
一春忙過無多日
又聽鸝鷀報麥黃

高鎔

春日田園雜興

已學淵明早賦歸
東風吹醒夢中非
鶯聲睨睨來談舊

牛背安閒勝策肥時聽樵歌時牧笛間披道氅間農衣
篇詩那可形容盡何似忘言對夕暉

胡瑀

春日田園雜興

野水渾邊戲乳鷺疎籬缺處晒耕蓑草青隨意牛羊卧
門靜無人燕雀多夫倦倚犁需婦饁翁歡擊壤和孫歌
新來別有營生計又喜巡檐住蜜窠

黃景昌

春日田園雜興

野色搖春麥正肥
煙邨閒寂往來稀
未多桑葉蠶初浴
更小茅茨燕亦飛
行市綠蛆花潑眼
卧依黃犢草侵衣
數聲桐角歸來晚
楊柳移陰月半扉

姜霖

春日田園雜興

老盆傾酒試新嘗
社鼓邨邨鬧夕陽
麥壟風微牛睡穩
芹塘泥滑燕歸忙
半邨飛雨斷煙溼
一徑落花流水香

鼎貴安知此中意徒能學犬吠邨莊

東必曾

春日田園雜興

嘆綠郊原春事深
治生幽趣豁塵襟
聲聲禽語耕人意
種種花開老圃心
桑葉漸舒梯欲整
麥苗暗長路難尋
日長雖有荷鋤倦
薄暮歸來常醉吟

方尚老

春日田園雜興

東臯雨後土膏肥
夙駕烏犍出短扉
秧水平疇蛙閣閣
菜花滿稜蝶飛飛
比鄰社酒歡猶在
牆壁農書事已非
獨喜桑麻今正長
淵明歸去最知幾

朱孟翁

春日田園雜興

飮餽蔬盤已竹萌
如何布穀未催耕
牧兒嬾散騎牛過
遊子牽連信馬行
秧際窺魚翹白鷺
花間捎蜨下黃鶯
東風歲歲添新綠
獨我霜髯多幾莖

劉時可

春日田園雜興

土膏初重雨初收
草徑茅亭趣最幽
坐睡畧無朝市夢
踏歌時有里閭遊
半丘秧秫醉堪酒
五畝樹桑寒可裘
老圃老農誠足學
不成吾道付滄洲

許元發

春日田園雜興

片雲豈是出山時
曾被東風誤一吹
歸意不煩啼鵲勸

關情只許落花知
桑麻窮巷扉長掩
煙火空林黍自炊
栗里輞川非謬計
晴窗子細味渠詩

洪貴叔

春日田園雜興

棄官杜甫罹天寶
辭令陶潛歎義熙
暖日浣溪仍舊跡
春風栗里只前時
茁生阡陌培嘉種
花繞林塘發故枝
佳興二公能領會
可能胸次太多詩

徐端甫

春日田園雜興

曉出東郊跨蹇驢
弄晴微雨潤如酥
犬依桑下烏犍卧
鳩雜花間黃鳥呼
楊柳嫩搖風氣力
稻秧新著雨工夫
農家滋味誰知得
飽飫豚蹄酒一盃

朱釋老

春日田園雜興

家山萬象春歸好
詩筆拈來感物情
泉脈動時毋待灌
土膏起處正宜耕
無窮懷抱春和暢
不盡形容雨發生

試問封侯萬里客何如守拙晉淵明

李萼

春日田園雜興

邨居只是舊衣冠北墅南園熟往還
雨外泥深牛轂鯨花邊風暖鳥間關
躬耕自得莘郊樂日涉誰知陶徑閒
只說桑麻元自好不須釋耒歎時艱

陳君用

春日田園雜興

春風冗我田園務野思芳情約不齊檢點瓜丘仍芋壠
按行桑野更秧畦偶陪靈運山前屐或學東坡雨外犁
薄暮倦歸專一事旋誅生菜甕黃虀

俞自得

春日田園雜興

暄和春景好供詩日暖風輕土脈肥白鷺時窺秧刺刺
黃鶯頻說柳依依幾回野水聞姑惡數樹春英叫姊歸
物態滿前看不足等閒吟詠對斜暉

陳希聲

春日田園雜興

田園興在早春時
眼纈生紅喜上睂
門巷日高人埽雪
池塘煙漲水流澌
杯杓新歲歡同社
燈火元宵鬧古祠
野老告余春事及
夜流小雨過前陂

田園興在半春天
春事關心夜不眠
護撒秧畦須擁水
闢栽蔬圃更隄川
青囊子粒鄉風舊
翠箬靈芽社雨前
獨立斜陽無限意
一聲撥穀野橋邊

田園興在晚春頭且說田蠶兩事休榆莢雨酣新水滑
棟花風軟薄寒收青楓蛾子催桑月綠樹鷓鴣報麥秋
但願花邨無吠犬時呼薄酒背眠牛

戴東老

春日田園雜興

昨夜西郊雷隱鳴金穰檢歷兆秋成槍旗味向茶畦蓄
餅餌香從麥隴生拂去梁塵招燕乳撥開檐網看蜂營
誰家子女羣喧笑競學賣花吟叫聲

王鉉

湖山即景次尹綠坡

湖山掩映鴈潭秋，今古詩人說勝遊。
綠柳影分騎馬路，丹楓葉落釣魚舟。
前坡風送歸樵笛，別墅雲藏賣酒樓。
長記尋梅冰雪裏，羶鞵駝帽鷓鴣裘。

寄杜北山

倦客蕭蕭兩鬢秋，柳絲無力絆歸舟。
曉風落葉亂高樹，夜月行人入別州。
千里關河鄉國夢，一江煙浪古今愁。

鴈聲過盡青天闊，却憶同登望海樓。

宿香嚴院

地爐煨火柏枝香，借宿寒寮到上方。
山近白雲歸古殿，風高黃葉響空廊。
敲門僧踏梅花月，入夜猿啼楓樹霜。
夢醒不知窗日上，時聞清磬出松堂。

羅公升

蛾眉亭

在牛渚磯上大江分流環滿而過太平無為和州三城皆在目睫江行絕

景也

萬里風濤競擊撞乾坤說險鍵南邦五更畫角三州夢
兩岼青山四面窗太白風流空舊月虞公勲業自長江
倚闌何物堪持玩萬頃頗黎鷺一隻

趙善璫

避地惠陽鼓峰用徐心遠韻

收拾當年破勅黃山中蕙帳夢魂香風供松葉暖茶竈
雲卧茅窗凍筆牀一雨鳴蛙亂深夜數聲啼鳥怨斜陽
風塵浩蕩愁如海怎得中山醉酒方

俞琰

九日舟過彭澤縣懷故鄉

大江西望水茫茫蘆荻蕭蕭兩岸霜
喜有順風連十日恨無好酒過重陽
歸來陶令今何在老去杜陵空自傷
回首姑蘓白雲下籬花今夕為誰香

陳普

秋日即事

玉露金莖曉髮寒秋風仍作去年看
蛩聲疎雨長為客

鴈影殘蟬獨倚闌鐵硯窗楞雲影淡丹楓溪曲水痕乾
西風曾與黃花約擬掇繁英貰酒餐

三尺書檠對影居西風吹雪上吟鬚雲邊月色人千里
竹裏秋聲酒一壺客思邇來紅葉亂鴈聲南去白雲孤
季鷹自是知機者一念蓴鱸便到吳

鼓瑟

滿樓明月調雲和五十絃中急雨過彩鳳拂衣鳴翠竹
素鱗鼓鬣出寒波淒涼楚客新愁斷清切湘靈舊怨多

一曲更沈人已靜江頭雲挂綠嵯峨

朱絃聲奏徹雲清有客沈吟倚柱聽遺響一時存楚曲
斷魂千載寫湘靈珠隨明月生滄海船挾悲風過洞庭
絃索無言膠柱倒遙遙江上數峰青

蘓壽元

水退

轉眼江流已昨非便隨鷗鷺省漁磯飛花無復浪千頃
倒影依然山四圍不向靜中觀物理更於何處覓天機

興來倚杖斜陽外
弄徧潺湲未肯歸

黃希旦

竹洞

竹洞新開碧玉林
徑幽疑入五華深
夜篩明月一天靜
晝擁青雲四座陰
剪杖佇看雷雨化
迎風時聽鳳凰吟
煙霞不用重關閉
塵俗誰能遠訪尋

遊九曲

慢亭乍到興何長
獨上仙壇夜久涼
蟾魄照開三島路

松風飄散九天香
青山綠水年年好
白髮紅塵日日忙
休問蜉蝣蝸角事
無何認取舊家鄉

葛長庚

靖通菴

靖通菴外鎖晴雲
壁瑩飛瓊瓦
壘鱗野鳥無心一聲曉
巖花有意四時春
鑿開風月長生地
占斷煙霞不老身
虛靖當年仙去後
不知丹訣付何人

黃鶴樓

白雲黃鶴跡成遺何獨當年丁令威洞裏不知朝市改
人間再到子孫非笛聲吹斷秋江黯月影飛來夜漏稀
不醉倚樓呼費禕蓬萊山下幾斜暉

秋日有懷

一點秋光寄畫圖秋來吟髯似楓疎晴煙染樹看何足
缺月梳雲狀不如暑退涼生蟬有語水長天遠鴈無書
此心直欲鵬南舉不學蜘蛛結網居

夢中得五十六字

醉醒曳杖訪松關正在黃昏杳靄間
旣去復來秋後暑似無還有雨中山
澗邊幾葉晚花落天際一鉤明月彎
自覺餘煙埋屐齒行行印破蘚痕斑

胡中隱菴中傷春

盡把天工付祝融東皇歸去太華宮
稜稜山色聳蒼玉湛湛波光清碧銅
楊柳入天鳩要雨海棠落地蜨嫌風
好將杖屨西園看萬紫千紅一夜空

則之

雪霽觀梅

荒園晚景斂寒煙，數朶清新破雪邊。
幽艷有誰能畫得，冷香無主賴詩傳。
看來最畏前邨笛，折去難逢野渡船。
向晚十分終更好，靜兼江月淡娟娟。

契嵩

入石壁山

身似浮雲年似流，人間擾攘只宜休。
老來已習青蘿子，隱去應追帛道猷。
直入亂山寧計路，定看落葉始知秋。

他時谷口人相遇莫問裁詩謝五侯

著書罷思南還復會客自番禺來因賦此詩

平昔著書今始畢南還終欲隱羅浮
初春況遇故鄉子終夜更誇滄海遊
但貴羊城風物好豈辭梅嶺路岐修
應須相與葛洪輩抗迹山林送白頭

同公濟冲晦遊天竺兼簡呈伯周禪老

愛此蕭然松塢深詩流邀我此相尋
蒼茫寒日纔開霧靉靆濃雲又結陰
安石放懷還劇賞皎然乘興合清吟

主人勸駐禪扉宿況值梅香正滿林

惟晤

次韻和酬永安東山禪師

白雲滄海一重重
傍舍遙聞隔塢鐘
月上更無人語鬧
雪深空認虎行蹤
詩書共喜燈前論
茗果翻疑夢裏逢
脫塵高談無限樂
煨爐寒擁日高春

次韻酬公濟遊靈隱遇雨呈普慈及二詩翁

雨洗羣山秀色分
一筇雙屐到松門
天邊雲散爭歸洞

島外樵還各占邨久著青袍心已厭相看白首事休論
請君細問黃梅老當信禪河別有源

次韻奉和公濟宿天竺再贈東山禪師

燈火青熒雲塢寺青猿叫斷有餘音檻梅雪白春風近
山雨盆傾澗水深背世跡憐高鳥卧結交心契老松心
酬君秀句無新語徒攪詩腸徹曙吟

道潛

廣陵城外野步呈莘老

林梢聒聒鳥聲繁積雪初消澗水渾老樹卧波寒影動
野煙浮草夕陽昏風迴笛響山前路犬吠人行竹外邨
杖屨不知幽興遠歸來新月在柴門

次韻孔天瑞秀才見寄

雙溪秋色最關情想見登臨爽氣生木落草枯山自瘦
潦收沙白水偏明眼中舊事煙雲散篋裏新書早晚成
來歲如今好時節看君高步躡鵬程

夜泊淮上復寄逢原

黃沙白草滿淮垠
逆旅蕭條思不禁
風約亂雲歸隴首
角催明月出波心
槎頭湧處潮初上
斗柄移時夢未沈
遙想故人投宿地
畫船應在碧榆林

夏日龍井書事

自憐多病畏炎曦
長夏投蹤此最宜
青石白沙含淺瀨
碧梧翠竹聒涼颼
雲中雞犬聽難辨
谷口漁樵問不知
斑杖芒屨隨步遠
歸來幽火認茅茨

竭來人外慰棲遲
谷遠山長萬事遺
好鳥未嘗吟俗韻

白雲還解弄奇姿
藤花冉冉青當戶
竹色娟娟碧過籬
不羨故人探禹穴
短橈孤棹逐漣漪

遊徑山懷司馬仲才

柔桑蔽野麥初齊
布穀催耕雨一犁
略約時橫溪上下
薔薇間發水東西
重尋勝處追前賞
無復斯人手共攜
回首春風增感慨
綿蠻黃鳥更悲啼

照閣奉陪辯才老師夜坐懷少游學士

猿鳥投林已寂然
芭蕉過雨小樓前
雲依絕壁中間破

月自遙峰缺處圓
照坐不須紅蠟炬
可人惟有蕙爐煙
校讐御府圖書客
疇昔還同此夜禪

元淨

次參寥韻

巖棲木食已皤然
交舊何人慰眼前
素與畫公心印合
每思秦子意珠圓
當年步月來幽谷
拄杖穿雲冒夕煙
臺閣山林本無意
故應文字未離禪

惠洪

寒巖寺上元懷京師

上元獨宿寒巖寺卧看篝燈映薄紗
夜久雪猿啼岳頂夢回山月上梅花
十分春瘦緣何事一掬歸心未到家
却憶少年行樂處軟風香霧噴東華

晚秋溪行

熟路沿溪過石橋埽除秋晚淨迢迢
幽尋忽見蘭芽茁小立仍逢柿葉飄
撲攬水飛雙去鳥玲瓏山響一聲樵
歸來半掩殘經在燕寢香凝碧未消

元祐五年秋嘗宿獨木為詩以自遣今復過此
追舊感歎用韻示超然

蹤跡漂流不繫船舊游曾到意茫然玉笙悲怨初涼夜
秋月嬋娟落木天往事已嗟如昨夢壯懷無復似當年
鑪峰當眼空相向因念區區想見憐

夏日偶書

碧縷橫斜試水沈紅腮甘冷嚼來禽含風廣殿聞茶響
轉日回廊暗柳陰強撚冰紉餘睡色倦憑琴几適閒心

攀翻浣衲黃塵事過眼雲蹤不可尋

中秋對月

好天涼夕病衰餘散步中庭瘦策扶禪客相逢宿山寺
玉輪同看上雲衢十分歸思懸江國一半秋光入髭鬚
草露溼衣香霧重更將毛骨洗冰壺

送瑩上人遊衡嶽

紫蓋峰頭樓閣生朱靈洞口水雲晴盤空路作驚蛇去
落日人如凍蟻行重郭老師今健否藏年珍木但聞名

定應自埽巖邊石時發披雲嘯月聲

訪友人

日暮荒城倚瘦藤江南春思倍添增那知淮水黃塵路
忽見廬山綠髮僧乞食久辭煙際寺連床今對夜深燈
明年我亦尋君去同陟天池最上層

贈王司法

輕帆已有渡江期高會清遊惜此時水閣颺煙晴試茗
雪窗剪燭夜論詩衝寒遠鴈來橫浦弄色新梅半糝枝

林下自知無一事亦應風月動闕思

和許樂天

滄溟曾見化微塵
花發桃源幾度春
俗眼莫輕狂道士
此身應是謫仙人
清彈一曲悲風遠
絕嶂千章白雪新
異日三茅成卜築
却因瓶錫得為鄰

次韻超然竹陰秋夕

月脇雲行夜未深
滿庭風露葉辭林
知誰牆外千竿竹
分我窗西一畝陰
山好已無歸國夢
老閒猶有讀書心

剩題詩句酬幽隱歲月翩翩接翅禽

至圓通僧覓詩

漱霧跳珠響澗泉千峰秀出雨餘天
共驚繡帽銅腮老重到香爐石耳邊
清境荒涼歸歎息故人迎笑尚依然
明年過此還相見應及春風社燕前

送僧遊南嶽

古寺閒關聊作招夏秋歸思謾迢迢
枕中柔櫓驚鄉夢門外秦淮漲夜潮
想見舊房生薜荔不堪疎雨在芭蕉

何時却理緣雲策峰頂同誰看石橋

送僧歸石門

曾學雲菴逸格禪別來江柳幾春煙相逢水寺初嘗橘
忽憶風簷共擘蓮遙想到山寒食後却思分手上元前
與誰振策西湖路清曉一聲啼杜鵑

湘山獨宿聞雨

殷牀鐘靜自垂簾庭樹無聲欲雪天山寺淒涼容我宿
地鑪深暖枕肱眠銅瓶秋蚓為誰泣蠟燭春花亦自妍

夜半夢回聞驟雨十年蹤跡一茫然

別李公弱

殘紅換得綠陰成
隨分閒愁取次生
須信百年終有別
未能一日便無情
何時嶽色君同看
後夜湘晴我獨行
好在西園行樂處
為誰依舊月華清

鞦韆

畫架雙栽翠絡偏
佳人春戲小樓前
飄揚血色裙拖地
斷送玉容人上天
花板潤霑紅杏雨
綵繩斜挂綠楊煙

下來閒處從容立疑是蟾宮謫降仙

如璧

次韻孫嚮仲自靈隱歸餘杭二首

淡月晴風奏曉涼春回草木被餘香溪橋邨落牛羊散
竹塢人家桑柘忙大樹稍疑經櫪社羣雞端恐過尸鄉
年來課最何須問翁媪茅簷話短長

冷泉亭下漱甘涼十里猶餘齒頰香入境自知風俗厚
到家應覺簿書忙好依名教窮真樂莫指溫柔是故鄉

此理不疑何用卜誰論筮短與龜長

祖可

楊梅

五月楊梅已滿林初疑一一價千金味方河朔蒲桃重
色比瀘南荔子深飛艇似聞新入貢登盤不見舊供吟
詩成相寄山中友恐解樓頭愛渴心

顯萬

送炭與湘山西堂惠然師

紛紛向火乞兒多獨有君如擇乳鷺萬鍛鑪中尋粲可
一堆灰裏撥陰何雪欺敗屋閒屏柄草卧空庭任雀羅
亟送烏薪相暖熱恐隨春夢入南柯

元肇

上淨慈北磻簡和尚

橘洲骨冷不容呼正始遺音埽地無一代文章歸北澗
十年梵語落西湖人皆去獻遼東豕我獨來瞻屋上烏
春暖閉門無恙否楊花飛作雪糝糊

斯植

旅懷

十年不倚謝公樓，滿眼淒涼上客舟。
往事盡隨流水去，青山長憶故人游。
海門風起天將暮，渡口雲生樹欲秋。
絡緯自啼花自落，更堪回首是他州。

登吳山

嵯峨宮樹靄晴空，吳越迢迢一望中。
幾處笙歌人遠近，萬重花柳路西東。
風生簾幕春雲碧，水遶樓臺海日紅。

沙鳥自飛還自宿百年無計與誰同

倣樊川體

吟邊遶架書千卷壁上梅花水一瓢
世事盡從忙裏過年華空向靜中消
山雲宿雨籠殘日汀草浮香滿小橋
對此不須惆悵去野人今已悟吹簫

永頤

初秋憶湖上諸山

山中夏日足幽娛
葛幃藤牀誦寶書
白拂惹雲黏几案

清香緣竹上空虛草堂夜月秋花近水閣晨霞夕靄疎
遙憶錢塘舊朝寺繞湖鐘梵早涼初

游何山登道場

中流望極山頭寺溪午聞鐘泊柳津春草細霑微雨潤
老松高與碧虛鄰鶴歸煙麓書堂廢虎去寒巖蘚石皴
無奈薄遊歸路晚水邊風旆溼征塵

了慧

春日田園雜興

平疇水遶徑微分小圃雲深景不繁此處農桑雖是僻
多情鶯燕不嫌邨倦眠芳草閒黃犢靜對幽花倒綠尊
見說弓旌方四出欲更名姓揜衡門

道舉

過鄭居士齋

竹裏蓬茅掩棘扉主人詩瘦帶寬圍種成苜蓿先生飯
製就芙蓉隱者衣柳絮春江魚婢出荻花秋渚鴈奴歸
小溪短艇能容我先向溪隈築釣磯

方勉妻許氏

夫犯夜禁代呈法官

明時樂事娛詩酒帝里風光剩占春
況是白衣重得侶不堪青旂自招人
早知玉漏催三鼓肯把金貂換百巡
大抵仁人憐氣節弗教孤客作囚身

朱淑真

晴和

海棠深院雨初收苔徑無風蝶自由
百結丁香誇美麗

三眠楊柳弄輕柔
小桃酒膩紅尤淺
芳草寒餘綠漸稠
寂寂珠簾歸燕未
子規啼處一春愁

晚春會東園

紅疊苔痕綠滿枝
舉杯和淚送春歸
鷓鴣有意留殘景
杜宇無情戀晚暉
蝶趁落花盤地舞
燕隨狂絮入簾飛
醉中曾記題詩處
臨水人家半敞扉

暮春三首

纔過清明春意殘
落花飛絮便相關
銜泥燕子時來去

釀蜜蜂兒自往還風靜窗前榆葉開雨餘牆角蘚苔斑
綠槐高柳濃陰合深院人眠白晝閒

碧沼荷錢小葉圓眼前芍藥恣連顛清明已過三春候
穀雨初晴四月天乍著薄羅偏覺瘦嬾勻鉛粉祇宜眠
情知廢事因詩句氣習難除筆硯緣

舉杯無語送春歸分付東風欲去時燕子樓臺人寂寂
楊花庭院日熙熙枝頭添翠鶯先覺葉底銷紅蜨未知
詩卷酒杯新廢却閒愁消遣殢他誰

恨春二首

遲遲花日上簾鉤盡日無人獨倚樓
蜨使蜂媒傳客恨
鶯梭柳線織春愁
碧雲信斷惟勞夢
紅葉詩成想到秋
幾許別離多少淚
不堪重省不堪流

一篆煙銷繫臂香
閒看書冊就牙牀
鶯聲冉冉來深院
柳色陰陰暗畫牆
眼底落紅千萬點
臉邊新淚兩三行
梨花細雨黃昏後
不是愁人也斷腸

元夜二首

閨月籠春霽色澄深沈簾幕管絃清爭豪競勝連山館
墜翠遺珠滿帝城一片笑聲連鼓吹六街燈火麗昇平
歸來禁漏踰三四窗上梅花瘦影橫

火燭銀花觸目紅揭天鼓吹鬧春風新歡入手愁忙裏
舊事驚心憶夢中但願暫成人繾綣不妨常任月朦朧
賞燈那得工夫醉未必明年此會同

膏雨

添得垂楊色更濃飛煙卷霧弄輕風展勻芳草茸茸綠

涇透天桃薄薄紅潤物有情如著意催花無語自施工
一犁膏脈分春壠只慰農桑望眼中

柳絮

繚繞晴空似雪飛悠揚不肯著塵泥花邊嬌軟黏蜂翅
陌上輕狂趁馬蹄貼水化萍隨浪遠弄風無影度牆低
成團作陣愁春去故把東君歸路迷

新春

樓臺影裏蕩春風協氣融怡物物同草色乍翻新樣綠

花容不減舊時紅
鶯唇小巧微煙裏
蜨翅輕便細雨中
聊把新詩記風景
休嗟萬事轉頭空

易被妻

對雪

紛紛瑞雪壓山河
特出新奇和郢歌
樂道幽人方閉戶
高歌漁父正披蓑
自嗟老景光陰速
惟使佳時感愴多
更念鰥居憔悴客
映書無寐奈如何

盼盼

新春

十二闌干鎖畫樓春風吹損上簾鉤
花心柳眼從教放
蜨意蜂情一任休
好殢酒杯消舊恨
禁持詩句遣新愁
東君若也憐孤獨
莫使韶春便似秋

東湖散人

春日田園雜興

物色天成畫不如
東風又到野人廬
蜜蜂辛苦供常課
科斗縱橫學古書
小雨杏花村間酒
澹煙楊柳巷巾車

汀洲水暖蘆芽長更買扁舟伴老漁

九山人

春日田園雜興

軒裳一夢斷塵寰桑柘陰陰靜掩關
種秫已非彭澤縣采薇何必首陽山
因憐社鼓剛催老轉覺儒冠不負閒
君看浣花堂上燕芹泥雖好亦知還

桑柘區

春日田園雜興

粟爵瓜官嬾覲覲生涯雲水與煙腴晚風一笛麥秧隴
春雨半鉏桑柘區可是樊遲宜請學肯教陶亮歎將蕪
斜陽芳草關情處更把新詩弔石湖

草堂後人

春日田園雜興

桑眼已開芳晝長西疇東墅足相羊麥風初暖燕爭壘
林雨忽晴蛙滿塘野老新衣逢社喜山妻椎髻為蠶忙
紛紛遊騎踏花去誰識吾家舊草堂

君瑞

春日田園雜興

白粉牆頭紅杏花竹槍籬下種絲瓜
廚煙乍熟抽心菜
篝火新乾捲葉茶
草地雨長應易墾秧田水足不須車
白頭翁嫗閒無事坐對花陰到日斜

青山白雲人

春日田園雜興

昨夜東風雨一犁
曉晴鄰巷共熙熙
遮門賸喜有桑柘

輸國不憂無繭絲小婦餉耕因廢織老夫觀社忽成詩
眼前物物皆生意却恨淵明歸計遲

無名氏

衆樂亭

重尋佳景冠南州天與邦人作勝遊百尺臺成偏得月
四時花放不知秋當軒疊嶂高還下傍檻長溪咽復流
只道使君能共樂有誰能會使君憂

箕仙

命題賦筆


兔出山中骨似仙何人拔穎得尖圓拙夫堪笑堆成塚
豪客會同埽似椽窗下玉蜍涵夜月几間雪繭湧春泉
當時定遠成何事輕擲毛錐恐未然

謹案第十一頁後六行句從蒼蘊林中得刊本蘊

訛蘊今改

欽定四庫全書





總校官庶吉士臣侍朝

校對官檢討臣蕭九成

謄錄舉人臣李駟